

主編 黃靈庚 陶誠華

上海古籍出版社

金華宗譜文獻集成

6

金華宗譜文獻集成

六

東陽市委宣傳部 編

目錄

金華宗譜文獻集成（東陽宗譜一） 東陽市委宣傳部編

單國爐輯

卜

一

東陽巍山卜氏宗譜

一

陳

七

官橋陳氏宗譜

七

東陽檀溪陳氏宗譜

一〇一

亭塘陳氏宗譜

一〇六

東陽大楊陳氏宗譜

一一九

杜

一三三

東陽泉塘杜氏宗譜

一三三

東陽峴北杜氏宗譜

一九四

東陽峴西杜氏宗譜

二四六

方

三六七

東陽小鑑湖方氏宗譜

三六七

壽塔方氏宗譜

三七三

葛

三九七

東陽葛氏宗譜

三九七

何

四〇九

東陽何氏宗譜

四〇九

胡上

五三一

東陽前山胡氏宗譜

五三一

東陽柏溪胡氏宗譜

五八三

卜

東陽巍山卜氏宗譜

明翁卜老先行略 裡柏益二百十八里

聞之積善之家必有餘慶以故王子三槐寶家五桂千門之旋駟宋氏之聯芳皆因德厚得致天培豈非爲善之明效乎予也素性坦懷樂揚人善見有品行端方之士輒稱道不置因得交卜翁宗奎年兄者誠德行士也余心向慕之緣略序其大概公之世系出自各族其爲人也言行坊表舉止端嚴居家以仁處事以義敦本尚實不事浮僞凡族中有事排難解紛公直不欺庭無塵市之囂居有田園之樂其身可隱其富可養雖錦里生陶處士亦奚以過公娶俞氏係名門淑媛內則素嫻不幸早世公憐子幼續娶邢氏勤儉治家慈出性成產有一女適於宅口金家厥嗣厚重不佻克振前業緒孫濟濟恍如謝室芝蘭行將鳳起蛟騰爲卜氏光大者乎然此皆公盛德之流輝也是爲之記時康熙戊戌冬月之吉眷弟李秀會敬撰

贈卜君大防先生掌教無錫序

任天下之事而致天下之治者在人才人才必由於學校學校乃教化之本源政治之大端也是故五帝謹成均使行虧習備者各有成就迨三代黨庠術序之設亦以道德之儒耆碩之士範以師法所以

人材倍治化道大興卓乎不可尚矣降及後世雖治不逮古其賴人材以扶世迫亦必由學校教我朝重師儒益崇文教學舍遍區宇凡內而克諸巖廊外而有藩臬郡縣安上治下靡不賴所儲之人材今夫天下之宮室若承而爲棟衡而爲梁參差而爲榱桷俱賴材木然後宮室成被風雨使人爰居爰處優游以生死材木之贍也材木必產於山林人材必由於學校於乎山林掌於虞官厲禁不弛虞官之人得而後斧斤時牛羊不牧把拱連抱不可勝用矣猷師儒官學校實成就人才之根本職非其人人人才其可得乎昔者蜀有文翁而儒化興常袞在閩而士類進湘湖有安國而得人之獨盛乃知是職位雖卑任則大祿雖薄而稱則難事若少而功則廣今大防先生余老友也節高而不屈學醇而不雜成化癸卯以葩經領浙薦書禮園每址廷策賢之授無錫教諭無錫晉陵巨邑人秀而多文泰伯始封之地也時重進士選由質科而有抱者多不樂處是職大防則安於所遇且惴惴焉私慮厥任之弗堪其可與知師□之責者歟君茲往也肆力啓迪培養教育而不怠若職使人才彬彬而益秀他日棟梁榱桷以次收拾付工師以備明堂之用顧其不偉歟庸書以俟弘治九年歲次丙辰夏四月良旦賜進士出身承直郎刑部主事古杭陳珂書於西臺翠陰軒

贈興周卜君序 南渡謙百十五

士有讀書懷獨行君子之德者雖不能取當世之功名銘功業於旂常而立身行已爲一鄉之模楷宗族交游有薰其德而善良者蓋不必以彼易此也吾友卜君興周從先君子游者十餘年其淳謹成同

堂諸君子交推之四書文得先正體格而試輒困于有司其文名益噪於一邑人是以爲興周惜然而興周坦然也哉夫士人讀十年書工揣摩于浮摩恬俗之文以投時好幸博一科名輒揚揚自鳴得意而人亦以爲榮其於十三經廿一史五雅三通皆不能舉其要尚可謂之能讀書耶又況於躬行心得哉興周事親孝與人忠立身有本末所謂躬行君子非耶其不欲以彼易此也固宜興周有弟早夭後嘗於故舊家遇相士相其父子華先生云長子不得養終年而相興周當無子興周乃爲其父娶妾無子又娶一妾卒無所出今子華先生仙遊十餘年矣而興周亦年過五十強健倍曩昔而生二子長者已十歲相士之言不驗矣噫天者不可知豈術者好爲欺人之語故往往不驗耶抑修德必獲報興周有陰德及人特膺天眷而時命不足限之耶或以兩爲其先大人娶妾無子而天特予以二子耶予嘗寄居其家二載當是時予授徒剡西之雨錢寺數月一至家米鹽薪水日賴經理不以爲勞興周於友朋間大率若此故興周爲人落落寡合而所與交必成莫逆其以是哉時大清乾隆三十二年歲在強圉大淵獻秋月下浣之吉年家眷弟葉封唐頓首拜撰

宋故贈賜武功大夫卜翁墓誌銘

曩與觀察使蘊文卜君同歷宦階未幾拜某先大夫三府君于汴河第私獲接笑談甚相欵洽余以咎謗待罪淮西與蘊文別去不十年忽衰經至前爲之驚悸不勝知其抱戚也問余無恙外奉其先大夫行狀泣告徵銘涕爲之灑灑下余亦爲之潛然尚欲爲君銘哉明日蘊文爲之頗告其哀瘁之容復如前余莫能爲之拒按狀君諱暹字

幽華姓卜氏婺之東陽人高祖諱睿宋建隆中起家應開封府舉授大將軍幕府轉陞諫議大夫積階宣奉大夫拜僕射贈少傅諡文忠公魯祖諱矩太平興國中擢進士第拜知樞密行府大父憲父懷玉以經明舉授桐廬縣令母孫氏君自幼毅然與凡兒不同諧集以器識自高沉默寡言而籌度有條不素蓋自文忠公以來世襲忠厚家尚蓄牧山林園池之物蕃阜浩穰而不務奇麗紛侈欲寡而事節貴德而賤利當時知各見許遠近咸歸自是役志起家以教之爲務別築室於巍山東北整飭雅潔有讀誦之處館客之室畢張奉給之具茶爐格觸目具足禮延名彥招四方嫻戚子弟從而問道解疑者益衆館餐之費出于中蓄而不靳晨夕惇命長子那與幼子玆母少荒侈而以移其志爲諄諄篤遣立致學就姓好勤於治理田園邸舍纖密有叙世稱幽華移以治民當踰於家淳熙中以子貴贈武功大夫君不自以爲榮如若寒素以慶元丙辰二月十九日卒於正寢享年七十有七配周氏子男四人曰那曰催曰詵曰玆玆仕兩淮觀察使孫男九人文質文顯伯祥文變輔德輔翊輔周輔仁輔志女三人長適本郡章如志次適招武軍節度判官句無陳炳又幼適進士徐本許聘未行曾孫男女人將以其年冬歸窆于本里巍山東前塢祖隴之左原君臨終神色不亂呼其長子那告曰余宣勞于家有年至於今日頗有美餘吾歿後宜益治儉以淑厥志爲務幼弟改官之日當以吾語告之言畢而逝人謂君語符古之名士是宜爲銘銘曰生有茂績而不踰其則沒有遺訓而昭乎式吾於卜君可無盡後欲知君視茲石時大宋紹興丙寅仲冬望日吏部尚書柏溪尚谷麻大猷謹書

宋故兩淮觀察使積階武功大夫卜君墓誌銘行

十八

淳熙癸卯十月十六日武功大夫兩淮觀察使以疾卒於杭邸嗣人界櫬歸窆於本里菱塘荷花心之原長子輔德狀其歷官歲月巔末至郡庠乞銘初嘗會公於京師道鄉梓話交契未幾別去君以智略參謀北征不會者幾十年迨陞觀察使巡省邊警偶獲聚首又逾五載余承薦本郡教官又會京師而計聞嗣子以公墓道之文委撰鐫石曩者國事艱棘臣寧不遑寧居兩淮之師屯駐猶豫進止未決長驅審策圖料先事以其志未定謀未出乘機直搗收功江表而定都掌戎律者固嘗出奇計而事勢紛午東突西墮君時參預大業籌繹議擬以國家體勢不能收人材訓師旅撫邊氓振國威未有申明上意張大鴻圖君之裨贊屢出奇計師徒整肅陞兩淮觀察使嘗告闔戎大臣當今士之大夫之氣貴剛而不貴柔貴強而不貴弱剛不侮於人弱則不懾於已有進而無退而無靜故氣實則闔有餘氣餒則守不足使憑凌乎三軍之上而料敵決策明照乎事物之表何患事不成功不立廟謨不洋安得紹興初諸臣相與宏定綱維張太國體哉我府爲褒許良久既辭解參預之職巡察攷訪鞠師徒省疲瘵周困餒捕叛亡邊徼寧謐胡虜運遠未幾遼人兵突漣水不門拜密計詎之皆出君之掖贊使君大用則收功大勳有焉既而歸老固留不肯以年七十有九卒配劉氏男五人輔德輔翊輔周輔仁輔志女二人長適承務郎張涇次適國子司業虞暉孫男九人汝賢汝霖汝昭汝礪汝楫汝誠汝諒汝英汝汝玉其先良驥唐天寶中由姑蘇之

吳以儒宦仕婺之吳寧儒學教諭因徙於巍山居焉生炯經明舉儒林郎廣州錄事參軍又六世而生僕射少傅文忠公睿又二世生憲字庫翁曾大父也大父諱懷玉仕桐廬縣令父諱暹母周氏唐宋累葉皆有名宦君以才智淑起嘉有猷昭前翼後之勳收功集雖決於廟堂而志顯白矣銘曰機之純由乎謀之定用之顯由乎神之秘茫昧未而不可窺測區畫酬擬及於有際考績定勳鏤于幽隧時大宋年冬十一月既望寶婺儒學教諭陳留韓軾撰

如揚翁墓誌刻邑蘇車之祖

繩繩子孫惟先人之德業疊疊科各悉祖靈以默佑古今以來未嘗不由乎蔭址得蔭者矣昔如揚翁同王氏宜人樂善好施廣濟貧窶之人居忠行義不入奸淫之輩世所歷表者矣有一地脉從四名而起過剡地以落新境三十八九都坐支千畝得結穴也此地山迴水繞峰巒疊向雖不在高山之上而難求平地以一堆若非先人之德澤安能得此地乎況得之後遂將如揚翁同王氏於天順年間即將此地以安厝之也名曰蛛蜘蛛及葬以來子孫蟄蟄家振非常皆由此而發也於今觀之寧不在心地而得吉地者以乎是爲誌乃銘於垂萬古云耳時天順癸未仲冬北場賜進士出身敕授大勳兵部尚書呂光伸撰

明故鄉貢進士大防先生墓誌銘

公諱垠字時際行顯百四大防先生別號也其先自姑蘇之吳寧代不乏人歷有可考不復贅焉其曾大父曰居讓先生大父曰雲樓

翁皆隱德弗□者見先生體貌豐偉器度軒昂而穎悟涇渭夙有大志乃廣延嚴師宿儒以教之而先生亦自幼負氣節常從台□陳

先生遊深爲許可先生喜得所依慨然以天下事自期待敏於進取以求□親師之望惜年十七而早失所怙臂力滄灑以事母氏敦敬兄長鄉邦咸稱其孝弟暨服闋遂入邑庠至今誦其行義焉繼爲家貧親老自曳白而黜居無何太夫人亦從宴世於□□□激烈每念二親弗獲祿養實志以歿愈勵志効用思以顯揚之凡聞各卿碩士不憚遠致必從遊焉適縣尹謬公試之奇材力直於僉憲以復之因爲改昔名銀字時用爲今名字是科遂第鄉薦中式六十四人主司錄其文以式後學時爲成化癸卯也及赴春闈病不終卷乃受選無錫縣教諭士夫相揖咸賀得人於教化之先既如任酌胡程朱子條約而講明道統義理勸懲激勵彬彬雅厚之風故出其門者往往皆新德碩望之士未幾陞知蒲田縣事弗克至已卒於官其子源昇輓歸葬仍奉鄉友鄉貢進士汝和王先生所叙行實哀告丐銘於予予維小居鄉校辱與公遊最久已而出處去就所遇不齊者幾三十年惟聞而喜其風教之甚宜於時將謂徒步公卿大行厥志孰知其遽止於是耶追緬生平不能不爲之太息流涕銘固不得以匪文辭也嗚呼先生承父母之志而卒顯揚之繼先人之躅而勿替引之者孝也荷振作之任而士風以正報師友之德而土俗歸淳者義與德也其景行德澤流風善化可則可度不詭不隨而爲叔世之所仰止者又其道之至善也噫惜哉未及普教天下一疾不瘳而弘治乙丑十一月十九日子時遂棄塵事也垠生正統己巳二月廿四日亥時享年五十配長侃金氏生卒未詳生子男一曰源女一適華溪虞繼

十九都應氏有賢淑生天順甲申八月廿二日卒弘治辛亥五月廿五日享年三十八歲合葬本都西園之原去家百步許生子男二人曰浩曰年女一適長侃金孫孫男八人間有岐嶷可畏者焉知他日不如先生之再作也是爲銘銘曰先生之生也天地鍾精先生之歸也時正德賜進士第奉議大夫湖廣左參議提督太河邑人盧煦撰

行福四善恭公像贊

蒼然多壽者德之貞也混然不息者心之澄也宜其根固枝茂源深流清又何必尋常作棟梁誠可謂涓滴成滄浪者也玉華山樵寓題

巍山八景圖歌并序

東青文華卜君別號望山者其先人有曰村居翁酷好巍山八景而周旋其間更集四方文學之士相與吟咏賡歌緬想此翁邈乎其遠矣而八景煥然如舊也文華應志與相肖乃命丹青繪而圖之以供逸興噫今之文華君即古之村居翁耳因喜而樂道之故欣然作歌以贈云猗歟美哉東青麓廓有其容非局促周迴八景若天成乾坤明造英雄福排闥名山特送青上有疎梅清馥郁五更落月尚徘徊何必巫山峰六六洞門無鎖高嵯峨氤氲雲葉多於簇吞吐攸揚無定期百恠千祥總含蓄兩橋夾水卧蛟龍波瀾蕩漾搖綠時當春服之既成袒楊苔磯濯纓足縈紆路入翠微申梵宇清虛勝天竺夕陽西下一聲鐘大吼蒲牢應空谷降觀蟠屈巖城橫古廟幽居隱叢木千年陳迹尚卓然落日秋風聞楚曲峰迴路轉更有亭處士夷尤漫吟讀蔚乎蒼翠松菊存堦草生生最清淑晴巒絕頂之龍湫四時

活潑流清玉瑩淨了無一點塵對之不覺開心目縱橫優渥南隴間
纍纍僊郭烟霞覆斷碑醉卧不計春流風餘韻祛囂俗美哉望山就
此景信乎能步村居躅時皇明嘉靖戊申歲冬十一月越朔七日穀
旦鄉戚上崗龍厓呂灞邦津謹識

東陽巍山卜氏八景詩

梅峰落月

奇形天造畫屏開上有扶疎幾樹梅午夜嬋娟銀鏡墮寒風猶送暗
香來

石洞隱雲

幽深石室幾經秋僊子遺踪今尚留還有白雲爲戶鑰時開時鎖未
曾休

兩橋春水

一谿屈曲抱村鄉虹卧東西跨石梁桃李谷風三月雨波流片片落
花香

孤寺晚鐘

寺底青山寺頂雲煙村遙隔絕紅塵蒲牢聲吼黃昏靜入定僧敲月
下門

隴頭僊榔

閑扶桐杖出城遊偶見誰朝仙故坵任使長生千百載終須一箇土
饅頭

峰頂龍湫

一泓清碧傍山顛神物中藏不計年幾度蒼生處禱處爲雲爲雨樂
堯天

巖城古廟

巖巖壁立類堅城廟建於中萬古名赫赫英靈鄉社主禳災錫福惠
群生

處士閑亭

數椽高架白雲屏兆應天文聚德星從彼德星寥落後年年山月照
空亭皇明嘉靖庚戌季冬望有五日長林光溪子王椿伯齡拜書

鷄鳴山圖玉樵山人所寫有詩因集其和詩云

蔣偉器

地入高堂勝圖從大筆傳野橋聯轡過古樹半天懸松嶺烟霞接梅
峰紫翠連西河推子夏早覺嗣孫賢

又

溪山翁郭霖

誰寫騎驢孟浩然天然名筆世爭傳白雲每自胸中出金印何勞肘
後懸齊魯好山青未了因何佳句景相連兩人對坐談玄久可是風
流擬昔賢

又

山樵者樓

梅峰聯柏嶺妙筆是誰傳驛路兩山並蒼崖一水懸故人青眼在茅
屋白雲連訪舊論疇昔長推子夏賢

又

玉華山人畫并次韻

平生詩與畫豈爲世人傳獨坐長松下遙看瀑布懸千崖空翠濕萬
壑白雲連乘興聊揮灑風流愧昔賢訪舊神僊里扶筇日月邊未吟
梅壑雪先卧竹山煙黃赤非真隱夷齊是古賢千年有遺墨一識性
天然

萬曆壬辰竹西虞德光訪余館覓山人詩畫識此
今亦吟云

詩畫貴名賢名人爭探傳名門子夏宅舊客性天然名友因舟楫迂
愚愧著鞭母家能寶此孫子紹盧前陸舟子龍田王仲震爲集此詩
因附口占非敢詩言也

陳

官橋陳氏宗譜

二修陳氏宗譜序

宗譜何爲而作也或曰爲親而作也噫如其爲親也譜可以不作矣爲其自親而疎自有服而無服此族之不可以無譜也今夫由身而上之爲父母爲祖父母爲高曾祖父母由身而下之爲子孫爲曾元孫自身而左右之爲兄弟爲從兄弟爲再從三從兄弟而九服之親盡矣服自衰而之總自三年而至三月雖恩有隆殺情有厚薄固可指計而名舉不應遂忽之以忘其咸在焉試披圖而覩之儼然一祖臨乎其上下子孫誦然派乎其下均是子孫也而貴賤也貧富也性情氣習也參差不齊如此試以祖先之心體之豈不榮辱萃於目前欣戚交於方寸哉惟賢且富貴者必隱度之於己曰我如是而彼不如是以爲吾祖羞可不念乎彼不肖而貧賤者亦當反之於己曰彼如是而我乃不如是以爲吾祖羞可不勉乎思之則訓其不逮救其災危力之所及軫而扶持焉勉之則擇術必謹慕善必力志之所尚勤苦而卓立焉皆期無愧於祖而後已則貧賤者豈終於貧賤不肖者豈終於不肖而賢且富貴者亦有勸示來者使世世相繼而長保其業將族屬競爽氣習如一情意轉親而不至於忘忽矣斯不亦尊祖收族之大義乎哉先范文正公有言曰是吾祖宗視之均爲子

孫無親疏也至哉言乎能以祖先之心爲心則於族乎何有不能以祖先之心爲心如譜何余自序其譜而因以爲陳氏譜叙誼至戚也若夫承傳之久遠門閥之光榮他爲叙者類能闡揚之茲不贅工部尚書寶謨閣直學士十四世館甥李大同頓首拜撰

三修陳氏宗譜序

洪武戊午四月朔日予叔父來告曰族譜既修汝曷叙之樸曰才譎而陋分卑而僭則樸豈敢叙叔父曰述吾志以記其實耳夫何陋耶又何僭之有卯樸不復敢辭乃述叔父之言曰予元寶公二十一世孫也名曰聖既襲次長其族矣自劉宋始祖諱元寶府君迄于今一千餘祀矣其世次昭穆歷歷可考實有賴於譜牒之存也有元之季兵革繼興宗黨散處譜系不修尊卑莫辨惕然已憂也洪武丁巳正月二日舉宗會拜於孝友堂禮畢告其弟彌善及其姪智翁曰孔子云立敬自長始教民睦也予豈有長於爾乎汝勵志好學將以明倫也始於家施於宗族達於邦國終而措之天下也必先明尊卑然後可以施愛敬苟譜系不明則尊卑何以序乎汝其圖之咸正玄拱手應之曰美哉斯志也吾族右於東陽者久矣子孫至於今而尚能相親者亦以譜牒存焉耳蓋嘗考之自十六世浚明公輯舊成編支分派別一以貫之厥後而再修者不一其人但中間瑣遺闕者有未免焉若泮溪後宅之異其第路西白塔之別其行其末流之弊有甚焉者宗族之不惇其或基於是歟前乎此者不可復追矣後乎此者改而正諸不亦宜乎弟子之職不命其承而況命之乎復謂之曰爾其敬之爾其勉之暨七月既望越三日甲子率衆祠于始祖并以其姪

所錄合族生年月日囑其弟曰爾常言先志之所不逮也罔或忽之於是考其支派定其尊卑葺其年月序其長幼圖之於前列之於後若昔之第有珍昌中榮貴五字之殊者今以泰字合而總之餘悉倣此而尊卑之分支派之源若網之在綱矣嗚呼吾族之譜凋敝久矣宗族亦將無以聯屬矣然而族譜之大成一二百年之後今復見之庶乎禮樂之興亦合族之幸歟叔父之言詳且盡矣樸敬筆之於書僭踰之罪終不敢辭因爲之嘆曰源之遠者委必大世之遠者後必昌吾先人之居於路西衣冠相繼家曰故家族曰舊族可謂遠矣人言路西必稱陳氏言陳氏必曰路西又豈一朝之故哉予叔父與其弟姪益謹譜牒厚人倫功加前時休垂後裔天蓋誘其衷益遠其世以昌其後人乎吾族之興諒不止於是矣爲子孫者豈不念祖宗之遺績者盡人道之所當爲光於前人顯於後世徒冒先烈而已哉是爲序洪武十一年四月上浣之吉歲進士任廣西鬱林州興業縣知縣二十二世孫樸謹序

四修陳氏宗譜序

東陽陳原厚今年春自官橋走青巖山中出其重修陳氏家譜徵予言於首簡予於原厚先君子廸傳先生忝斯文之交原厚弱冠時侍先生博士府君在太學又與先生之宗孫子毅有同遊之好故原厚之兄弟愛手尤深譜序之屬其何以辭遂受其譜而觀之知其先有諱元寶在劉宋時自開封避地於婺之東陽仁壽鄉至齊中興初捨宅爲觀而遷於路西子孫日盛蕭梁有合浦太守修政蹟載郡誌趙宋宣和紹興之間有嚴叟仕澄兄弟倡義保障輸財助邊宣撫聞於

朝援嚴承事郎叟承信郎仕澄承節郎南劍州都巡檢使承節生五子贈朝散大夫德高效范文正公立義莊以活宗族放翁陸先生游實爲記之朝散生三子而宣子以魁選人太學登進士第卒官崑山令炎同年擢右科第二人差知辰州軍州兼勸農營田事厥後子孫益以蕃衍皆尚義業儒至國朝復有諱樸者由明經薦入廣西鬱林州與業知縣原武累官至福建都轉鹽運使隨陞布政使兼署巡撫篆贈資政大夫從弟秉直亦以才選爲都督府掾考最授爵八品於是陳氏之簪纓蟬聯青紫揮映蔚爲東陽之右族也其譜牒之傳雖歷南北朝五季之亂而簡冊尚存十六世孫浚明二十一世係聚暨彌善皆嘗修之其詳略互有得失況所編止於洪武丁巳六十一年之間未有續其遺緒今斯譜實原厚同兄元慶因其舊而易以歐陽文忠公世經人緯之法而重編之前列世系譜圖次錄家傳行狀墓文名公詩文有繫於一族者復輯先世遺文於後通計若干卷余聞古有大宗小宗之法聖人所以叙天倫繫人心明教源敦政本者也自後世宗法廢而門第盛於是族譜之學興焉族之有譜其猶宗法之遺意者乎是故宗法既廢之後君子之有意於尊祖敬宗存禮睦族者其可置而弗之講乎陳氏之族自宋齊迄今千有餘載傳二十有七世矣苟無譜以統族屬別親疎則何以聯其族也哉凡名門右族歷世綿年文獻可考而足徵者以有譜牒存焉耳今之士大夫家類多苟簡其於先世譜牒漫不加修高曾以上祖考之名或不知也總麻之外尊卑之秩或不辨也求其如原厚之兄弟究心協志汲汲以緝其宗譜而不墜者一何鮮哉是譜也雖譜陳氏之族其於天倫世教亦不可謂無所益云韓魏公嘗曰能謹家牒孝之大也若原厚

之兄弟亦可謂能孝矣陳氏子孫尚慎寶之正統二年龍集丁巳春三月既望華川王稔序

六修陳氏譜序

譜牒之學明則人倫以之而明譜牒之設所以詳其祖考之所自出昭穆由是而序親疎由是而別子孫由是而不忘乎祖宗其於人倫之所係者至重古君子欲昭先德以啓後人未有不致意於斯也粵昔先王因生賜姓胙土名氏厥後或以地或以官或以王父之字大宗小宗犁然不紊宗法不廢雖支分派別莫不各知其祖考之所自出而興起其孝悌之心近世以來宗法既廢并譜牒之學亦昧而不講歐陽氏以飛走不若爲譏不亦宜乎東陽素多巨族而路西陳氏爲尤著在劉宋時有元寶者自開封來徙以積善起家捨宅爲觀至今猶以公之名名之世系之由實始於此下及蕭梁之合浦太守修唐之大理寺評事思監察御史虎宋之進士宣子夢雷至於我朝之閩中巡撫原武諸公科第蟬聯家聲益振其昌茂未艾也今元寶公之二十四世孫原厚余友貞白先生之次郎也正統年間曾修輯譜牒矣閱今三十餘年重爲纂訂較前加詳使今族之人皆知親親之義喜則相慶憂則相吊困則相濟危則相扶人倫由是而敦風俗由是而厚矣然則陳氏之後人閱斯譜者可不念原厚之用心各相勸勉乎余與貞白爲垂髮交原厚時往來問問一持譜牒謁余於赤松山中丐余序首簡余維陳氏之譜修葺再四前之鄉先生言之詳矣奚俟予贅爲雖然如原厚之留心於譜又烏可以無文爲辭乎遂忘其昏耄書此以應且俾世之昧祖考之所自出視族屬若途人者知

所愧焉或亦風化之一助云爾成化辛卯季冬朔日監察御史中奉大夫廣東按察使致仕八十五翁金華馮傑孟莫氏撰

七修陳氏譜序

陳氏系出虞陳胡公自周秦而漢而在賴川者爲特盛東陽路西之陳其先出自潁川許人太邱公後越南朝時有諱元寶者因劉宋兵興避地至東陽縣南仁壽鄉仁義里遂家焉齊中興初捨宅爲觀另遷東垓嶺下路西越四世諱修者梁時舉孝廉爲合浦太守嘗著喪紀之法事載國史七世諱思者舉孝廉官大理寺評事九世諱虎者舉孝廉官監察御史十五世諱仕澄者宋時承節郎南劍州都巡檢使偕二兄嚴叟倡義兵擊睦寇有聞東陽稱三大宅五府四名家路西之陳實爲三大宅之一既而族大以衍子孫雖析居散處人總以路西稱著其望也承節五子德佐德先德高德彰德強德高宋贈朝散大夫嘗斥田千畝置義莊賑活貧族陸放翁爲之記德佐二子仲材天紀天紀慶元丙辰登進士第德高三子宣子槩炎宜子登嘉定進士第卒官崑山令炎同年擢進士右科第二人差知辰州軍州事嚴子大亨大亨二子汝賢汝功汝賢子來儀實慶丙戌進士汝功子惟月紹定壬辰進士德先子椿椿子霖咸淳甲戌進士概子攸嗣攸嗣子肇寶祐丙辰進士羣從曰幾先曰昭先曰君采登進士官方州世多其人入國朝洪武間仲材六世孫樸由明經薦知廣西興業縣樸從子迪傳博學善詩文嘗修譜牒著其先世行實迪傳四子原遠原厚原深原廣而原厚原深俱以學行鳴族子原武官福建都轉運使陞本省布政使司署巡撫篆其他晦迹邱樊行誼高於鄉閭者

又不可以指數今原深之子平仲熙仲讀書佩道復義莊以亢宗聞平仲授冠帶榮孫潭遊縣庠習進士業光前啓後又有其人焉余久與平仲交特訪其弟熙仲信宿平仲出示其續修家譜屬予序之夫人道親親也親親故尊祖尊祖故敬宗敬宗故收族而欲盡尊祖敬宗收族之道莫先於重譜此仁人君子之於譜書不敢後焉且世之爲譜書者惟書其祖宗之諱字或有及其生卒之歲月而已乃若祖宗之善行履歷悉不書而後子孫亦惟知其祖宗之諱字而不知其世爲何如人雖有譜何益也今夫名鄉大夫功業烜赫於世者身死而名隨盡況賢而晦者乎不幸不得聞於他人而亦不聞於子孫耶吾觀陳氏之譜初倣歐陽氏法史家年表區畫條分書祖宗之諱次爲傳書祖宗之性行學術履歷以及生卒歲月葦地子女則倣歐陽氏法史家之傳加詳焉一披卷間上下數十世之祖宗若與之聲相接而氣相應也有賢子孫知重其祖宗而必企其爲人是或立德也立功也立言也必思所以延續之而求所以無忝也噫陳氏之爲譜其立例可謂善矣而陳氏之子孫若平仲熙仲與潭者誠可謂賢矣後之子孫尚必以平仲熙仲與潭之心爲心也不然雖富且貴君子以爲猶忝矣可不念哉可不敬哉弘治三年歲次庚戌六月吉旦鄉貢進士前延平郡文學掾縉雲樊阜拜撰

八修陳氏譜序

東陽陳君平仲手其家乘一編過予而言曰中夫之先出自有虞而受封於陳厥後以國爲氏散處四方當劉宋時有元寶府君者來自開封而家於東陽實爲始遷之祖由宋而來至於今歷年千有二百

由府君而下傳世二十有八其始居于邑之仁義里而至蕭齊卜遷于路西又析而之白塔仁塘洋溪官橋諸處族之分而居之徙者已非一所家之聞人若合浦太守之治行都巡兄弟之倡義德高之義莊崑山辰州之文科武舉福建都運之宦達濟其美者亦不一矣而譜其族人之生卒行事爲書以垂後者則自宋之淳熙嘉定至於我朝之洪武正統亦既四修之矣迨今又六十年生聚益繁尊卑莫序至有漠然相視如途之人者中夫竊懼焉嘗割田若干畝規復義莊以給其族之貧者先生既尋爲記之茲取家之舊譜以續其所不及益其所未備庶幾親疎有別而昭穆不紊矣願得一言序諸首簡以示後人使知所以續戎祖考而起其油然而孝悌之心焉則先生之爲賜大矣予受而觀之則其世胄之貴世德之美皆詳具於前人之叙而修輯之大要與勸懲之微意亦已備見於譜中不容贅矣予奚以爲言哉然竊有感焉今世之爲譜者莫不負其姓以立於天下曰吾門第大他不吾敵如柳子鐵鑪步之云者而求其續戎祖考崇德象賢則未有問焉今平仲復義莊以廣睦族之仁續世譜以明尊祖之義則其續而象之非有得於中庸之繼志述事者乎亦云孝矣特其所繼述者德高以下諸公之志與事耳若等而上之則元寶之祖胡公胡公之祖虞舜其志事之大爲法天下可傳後世寧獨如是而已乎平仲其早夜以思飭躬砥行求其所以爲法可傳者而繼述焉以率其族人以訓其子孫俾無忝於神明之胄不尤爲孝之大者乎斯又予之所樂聞也故不辭而爲之序弘治庚申冬十有一月朔旦朝列大夫南京國子祭酒前進士翰林院編修蘭谿章懋撰

十修陳氏譜序

余嘗選勝河洛過親友廬舍偶閱明道先生所云管攝天下人心須是明譜系立宗子法張子亦云宗法行則公卿各保其家忠義豈有不立忠義玄朝廷豈有不固不禁掩卷太息曰先正所謂重宗譜以固朝廷者即聖經由親睦而平章先修齊而平治之義歟歲壬申泰蒞婺之東陽其俗敦倫叙崇禮讓在故家右族攸壯祠宇以隆一本纂家乘以厚九族是其佩服於先儒之明訓者有舊歟抑聖朝王化淪浹之一徵耶邑治之南距二舍許爲官橋陳氏素稱衣纓望族甲戌春仲重修譜牒告成將就鈐梓族紳士固請余叙余維譜牒由來尚矣不惟其文惟其義文載於書義存於心明乎其義則竭誠孝以尊宗桃普慈惠以撫子姓廣集和以睦同氣推而致之誠孝可移於忠蓋慈惠可施於義安柔和可發於仁愛不猶先正所云明譜系行宗法即所以立忠義固朝廷管攝天下人心者歟此聖經本親睦而平章由修齊而平治者洵所爲先得我心之所同然者爾余因是不侈言陳氏世胄之貴介門第之華腴與夫宗支之蕃衍而第以修文先修義之旨爲陳氏勗之其子性能無感發而興起者與是爲序康熙三十四年歲次乙亥夾鐘月之旦賜進士出身文林郎知東陽縣事嶼山樵叟景應熊撰

十一修陳氏譜序

余自丙申秋杪余告旋里掌教崇文書院己亥春東陽陳子愛蓮來院肄業余甚器之是年恩闈即捷足徵余鑒之不爽也今八月官橋

諸紳友鄉試來杭官橋陳子族也因介以謁余語次若有所欲啓者因詰之乃出其譜牒懇序於余曰族譜曠修幾五十年今重輯將竣願先生弗愆一言以冠簡首余與陳子夙好不復固辭遂手其譜而讀之不禁矍然曰陳氏之先世固如是表表者乎世之稱右族者必道德勳名文學代有其人陳氏自劉宋元寶公捨宅爲觀後另卜於路西居焉此官橋陳氏之始祖也承此志者宋南劍都巡仕澄公之重建元寶觀即今南宮德佐兄弟五人修之大理評事思公之建昭福法雲兩剎像叔懿叔二公修之此所謂出其有餘溢於方外者也尤足尚者宋朝散大夫德高公倣姑蘇范文正遺意捐常稔田千畝創立義莊以周族鄰年深蕩廢又得平仲熙仲賢昆季復其制明亨同公設明德書院聘見山杜先生主其席大開講會闡姚江良知之學遠近觀聽者不下數千人允稱一時之盛義莊養也義學教也孔子曰觀於鄉而知王道之易易不於官橋陳氏見之耶至於勳名則蕭梁修公之□合浦宋嚴公見弟之禦睦寇宣子公之令崑山炎公之知辰州原武公之撫閩中文學則建書院之安山先生訓京衛之茶山先生論隆安之誠源先生自是而外其登賢書第禮部者又不可勝數也劉宋迄今千餘年矣而其光昭史冊者猶令人歷歷指之稱道不置東陽三大宅陳居其一不信然與茲緣華乘重光丐余序言以弁其首余維爲之前者既有以裕後爲之後者必有以光前馳譽膠庠者若而人觀光上國者若而人秀者詩書樸者耒耜從此日增安知先人道德勳名文學之盛不復見於今日哉是爲序乾隆四十八年歲次癸卯桂月上浣之吉賜進士及第前日講起居注官翰林院侍讀學士提督湖南學政東里盧文弨拜撰

十二修陳氏譜序

余奉命蒞浙江金華京師僚文咸與余言曰古婺素稱小鄒魯公此行不爲辱也及下車披閱郡乘自宋迄明名儒輩出鄒魯之稱洵不誣矣予蒞茲土當以鼓舞人材爲已任使人文雀躍後先揮映上副聖天子菁莪造士之意乃無忝乎其職因歲延文行並隆致仕戴東珊先生掌教麗正書院訂期會課文人接踵而來東陽官橋有陳子諱瑄字玉如者補郡庠博士弟子員亦嘗赴會焉其爲文樸茂余頗契之歲在丙子陳氏華乘重修陳子與叔姪永潮士官等編輯校閱事將告竣特譜來謁丐予一言以弁其首余以相契不敢辭因執譜而讀之曰嗚呼陳氏固若是其盛耶余於政治之暇披覽郡邑志守合浦者著喪紀之法治辰州者作平糶之歌知興業者明經子修仕閩州者巡撫原武睦寇義士嚴叟仕澄理學名儒教諭誠源袁貞節於吳寧則有王郭二氏齊芳名於蘇范則有德高大夫至於甲第蟬聯天紀耀繩以父子相繼而進士宣子中叔以兄弟同科而進士其間若霖若君采若潭名登巍科聲表仕籍係仁壽鄉陳氏者不可枚舉今讀陳氏之譜尊卑莫昭穆明簪紱光聯所載者悉與郡邑志符合豈若世之愚不肖昧其先世往往妄引貴族名賢以爲之宗生悖其親死誣其祖爲可悲哉矧復義莊有平熙記之者楓山章先生建義學有亨同誌之者應薇許鹽運郡志失詳後日修志者尤當錄之以彰陳氏繼述之賢嗚呼陳氏固若是其盛耶夫根深者枝茂源遠者流長陳氏自穎川陳太邱後裔諱元寶遷居婺東始爲路西繼爲官橋傳世三十有九其源不可謂不遠也善繼善述世德相承其根

不可謂不深也知陳氏子孫必能奮興鼓舞而爲前人爭光者可不勉哉是爲序嘉慶二十一年歲次丙子夏月賜進士及第翰林院修撰特授金華府知府護理分巡金衢嚴道前任湖南正主考提督湖南學政元和吳廷琛撰

登龍嶺下陳氏三修譜序

古者有宗法以統天下之氏族故苗裔有據源流有別而其相傳之系緒支派皆得於此考見以知其所由出後世宗法既廢士大夫始各自爲譜以紀其一姓世次昭穆之分長幼疎戚之辨爲子孫者皆得藉此以相親睦不至相視爲塗人於是譜之有關於氏族甚重也劉宋時有陳氏諱元寶字邱嚴公者自開封避地之東陽占籍於仁壽鄉至齊中興二年捨宅爲道觀遷於溪南曰路西宣和紹興間嚴叟仕澄兄弟倡義保障輪財助邊嚴授承事郎叟承信郎仕澄承節郎厥後炎與宣子諸公同年登第一門兩科是固吾東之世家巨族也嶺下之遷自邱嚴公之二十一世孫諱德忠公始歷今約有二十世矣孫子蕃衍正難更僕數也康熙庚午族約其祠因費浩繁不從所約越丙子忠美忠文元保公等特爲創輯永邑王同傑先生撰序詳矣至乾隆壬子再爲續修冊本較多距今年已五旬餘矣丁口之繁支流之盛亟宜重修譜牒以之秩其分聯其情而盡敦宗睦族之道也爰依舊本規模續成其世次有綱焉有條焉昭穆釐然不惟有以迪前光而且有以啓後人矣文祖予知己友也人盛從予學有年譜事既竣而徵言於予予思木之本盛者枝必茂水之源深者流必長積善之家必有余慶理固然也陳氏能積善於前故子孫日蕃昌